

Pcd cun analisa d'elecziuns e parolas da votaziun

Radunanza da delegadas e delegads da la pcd grischuna a Razén

■ (mc) La pcd grischuna e s'occupa da stersas saira a Razén cun ils projects federals da votaziun e cun l'analisa da las elecziuns dal cussegl naziunal e dal cussegl dals chantuns da l'atun passà. En ses pled d'avertura ha il parsura da la pcd grischuna, cusseglier dals chantuns *Stefan Engler*, accentuà che la pcd saja ina partidia politica fida da per famiglias e mastergn e per tut quels che mettian en il center l'equiliber e la raschunaivladad. Gist en temps economicamain difficils sajan ideas entusiasmantas ed investiziuns curaschusas dumandadas, activitads da vasta egliaida stagl activissem. La pcd grischuna vul concretisar sias finamiras en ina strategia 2020 ed Engler è persuadi che la pcd possia – cun sia politica objectiva ed orientada al resultat – contribuir essenzialmain al svilup positiv da noss chantun.

Sin plaun svizzer vul la pcd grischuna far valair sia influenza cun la candidatura da cusseglier naziunal *Martin Candinas* sco commember dal presidi e vicepresident da la pcd svizra. Cusseglier dals stans Engler è vegnì tschernì dacurt en la suprastanza da la faciun cristian-democratica dal parlament federal. Pli-navant vegn il nov parsura da la pcd giuvna da la Svizra, deputà *Tino Schneider* (Cuira), medemamain proponì sco commember dal presidi.

Il nov president communal da Razén *Reto Löpfe* ha beneventà la raspada accentuond la muntada da Razén cun ses chastè e ses bains culturals e sia renumada aua da Razén. A la pcd ha l'antierur deputà appellà da serrar las retschas e da betg sa cuntentar cun esser ina partida da las regiuns che promova mo interess regionalis, mabain da s'avrir per in'optica chantunala.

Cun in lung e ferm applaus è *Patricia Giger-Capeder* (Cuira) vegnida undrada per ses meritaivel engaschament da 20 onns en il secretariat da la partida chantunala. Ella saja stada «il cor e l'olma da la partida», ha ditg Engler. Sia incum-



Discussiun cuntradictorica al podi: da san Peter Hartmann, deputà Jon Pult, Luzi Bürkli (mainadiscussiun) e pro Martino Righetti e cusseglier guvernativ Mario Cavigelli.

FOTO Y. BÜRKLI

bensa surpiglian da nov deputà *Livio Zanetti* (Landquart) e *Silvia Casutt-De-rung* (Falera).

En pietad sa regordan ils preschents da l'antierur deputà e cusseglier naziunal Theo Portmann da Cuira.

Analisa da las ultimas elecziuns

Il schef da fracziun *Marcus Caduff* (Lumnezia) ha analisà las ultimas elecziuns naziunalas ed illustrà ils resultats cun numerusas graficas. Da quellas ressorta che la pcd è cun 16,8% pir la terza gronda partida, surpassada da la pps cun 29,72% e da la ps cun 17,6% e suandada da la pld cun 13,25% e verd-liberals cun 7,85%. En general han ins registrà che la pps ha fitgà marcantamain pe er en il territori tradiziunal da la pcd. Radund 38% da sias vuschs ha la pcd cuntanschì en Surselva, 33% en la Val Re-

nana, 11% en il Grischun central, 8% en las Vals talianas, 6% en Engiadina e 3% a Partenz/Tavau. Nagina autra partida haja tantas gliestas cumuladas e panaschadas sco la pcd, constatescha Caduff vinavant. Ed el tira ils suandants facits: En Surselva è il potenzial da la pcd praticamain exaurì. Anc betg absorbà è perencunter il potenzial en la Val renana, la regiun cun il pli grond augment da populaziun. Là ha la pcd bain ina buna basa, la regiun dals Tschintg Vitgs fin Il Plaun na vegn dentant betg considerada sco unitad. Er en las Vals talianas fissia il potenzial avant maun, el saja dentant vegnì tgirà memia pac ils ultims onns. Era la regiun dal Grischun central e Tumliastga disponia d'in electorat che possia anc vegnir «activà» cun in agen candidat avant maun. Per pudair recaltgar vuschs en las ulteriuras regiuns gri-

schunas dovria la pcd dentant cunzunt personalitads enconuschentas e profiladas, concluda il schef da fracziun.

Unanim per l'atgna iniziativa

Bestg surstà fa il fatg che delegadas e delegads da la pcd grischuna han sustegnì unanimamain l'atgna iniziativa «Per lètg e famiglia – cunter il chasti per maridads» che è vegnida preschentada da deputà *Livio Zanetti* (Landquart).

L'iniziativa da la pcd vul dismetter consequentamain l'inegualitad che maridads e pèrs registrads pajan dapli taglia che tals che vivan en concubinad. Quai saja malgist, tant pli che maridads e partenaris registrads obtegnian pli pauc renta che pèrs en concubinad. Quai malgrà ch'il tribunal federal ha decidì gia 1984 che in chasti da maridaglia cunterfetschia a la costituziun.

Discurs al podi

Il project per la sanaziun dal tunnel da via tras il Gottard è vegnida discutada a moda contradictorica sut l'egida da *Luzi Bürkli*, il schefredactor dal «Bündner Tagblatt». Dal podi han prendì part cusseglier guvernativ *Mario Cavigelli* ed il giuven giurist *Martino Righetti* da Cama per ils adherents d'in segund tunnel stradal ed il president da la ps grischuna, deputà *Jon Pult* ed il planisader da traffic *Peter Hartmann* (Termin) per ils adversaris. Ils adherents Cavigelli e Righetti han accentuà cunzun l'aspect da la segirezza e cun il traffic supplementar al San Bernardino en cas d'accidents e catastrofes che pretendan ch'il Gottard vegnia serrà. La via dal San Bernardino na saja betg concepida sco autostrada da transit e la qualitat da viver en ils vitgs vegnessia a patir sensibilmain durant il temp da sanaziun.

Ils adversaris han argumentà che il pievel haja acceptà cleramain l'Iniziativa da las Alps che pretendia ch'il traffic pesant vegnia transferì sin la viafier. I saja ridicul da decider davart la realisaziun d'in segund tunnel al Gottard senza spitgar ils effects e las experiens cun il nov tunnel da viafier.

Ina suletta vusch per l'iniziativa d'expatriaziun da la pps

L'iniziativa da la pps che pretenda che persunas estras che èn daventadas criminalas vegnian bandischadas è vegnida preschentada dal giuven deputà da Cuira *Tino Schneider*. El ha punctuà che l'iniziativa «per in repatriametn effectiv» na saja insumma betg necessaria, damai che il parlament haja gia realisà las pretensiuns essenzialas da l'iniziativa cun la lescha che saja en vigor. L'iniziativa restrenschia massivamain las cumpetenzas da las dretgiras e rumpia las reglas fundamentalas da nossa democrazia e mettia en dumonda noss stadi da dretg. Cun excepziun d'in sulet delega en tut ils preschents stads da quest avis.

Per l'iniziativa dals giuvens socialistis (Juso) ha la suprastanza da partida medemamain decidì la parola na.